

Mientras sospechoso abusado ta sinta trankil, victima ta yora den corte

ORANJESTAD – E homber P. acusa di a haci delito sexual contra un mucha muhe menor di edad, kier pa Hues lag'e liber pa e bay rehabilita na Bonaire. Esaki a wordo treci pa dilanti door di e abogado, despues cu a keda dicidi pa pospone e caso ya cu ta wardando resultado di investigacion forence na Hulanda.

VICTIMA TA YORA Y SOSPECHOSO TA TRANKIL

Tratamento di casonan di abuso sexual tin biaha sa ta hopi emocionante caminda famianan di e victima ta hopi afecta pa loke a pasa. Esaki tabata e caso diabierna, na momento cu e homber P., acusa cu riba 25 Augustus 2012 viola mucha muhe y a haci actonan immoral, mester a presenta dilanti Hues. Den sala di Corte tabata presente e victima, acompaña cu familiaran.

E caso a bin dilanti pro forma. Fiscal a bisa cu el a presenta un rapport medico caminda e dokter a laga sa cu e no ta sinti'e apto pa haci investigacion riba e victima y cu e

ginecologo no kier a presenta. Tambe Fiscal a bisa cu ainda ta wardando riba resultado di e investigacion forence NFI riba paña di e victima. No obstante esaki Fiscal a bisa Hues cu e ta prefera sigui cu tratamento di e caso. Abogado mr. Faarup ta haya cu e informacion forence ta importante pa e caso. Tambe el a bisa cu e sospechoso ya a haci preparacionnan pa na Bonaire wordo trata pa adiccion. E abogado a splica Hues cu na un ocasion caba e sospechoso tabata interna na Bonaire. Esey ta haci cu esunnan na e luga di rehabilitacion conoce P. caba y esaki ta haci mas facil pa e wordo tuma. Segun e abogado, tin palabracionnan haci cu si P. wordo laga liber pendiente tratamento di e caso, e lo keda den KIA te na momento cu e mester biaha pa Bonaire.

Por a mira claramente cu na momento cu e victima a mira e sospechoso P., el a cuminsa yora y tabata wordo consola pa su familiaran. Fiscal a bisa cu ta un caso se-

rio pero e no kier pa P. bira victima pa esaki. El a propone pa e abogado prepara tur cos y si tin tur cos prepara lo por tene un caso special pa pidi suspende e detencion pa e bay Bonaire.

Hues a pospone e caso un rato pa bay check e agenda di casonan pa mira si tin espacio pa trata e caso di suspende detencion di P. mas pronto posibel. E momento ey por a mira Fiscal cana bay na e famia y e victima y a introduci su mes. Por a nota cu Fiscal a conbibi cu e tristeza di e famia y a pidi number di telefon pa asina por keda den contacto cu nan.

Hues a bolbe den sala di Corte y a bisa cu e ta dispuesto pa diaranson 27 Maart 10.30 mainta pa trata encunto e peticion di suspension di detencion pa mira si sospechoso ta bay Bonaire. Ademas Hues a bisa Fiscal pa e dia ey fiha un fecha pa tratamento di e caso.

E sospechoso tur e momento ey tabata sinta trankil di dje y ora el a wordo hiba pafu por a mira con el a mira den



direccion di e victima y pone un smile riba su cara. Dia 27 di Maart lo mira si Hues ta suspende detencion di P., pa asina e por bay rehabilita na Bonaire.

Esaki no kiermen cu dia di tratamento di e caso, P. no ta bay ta presente. Ademas,

si Hues dicidi di suspende e detencion, esey tampoco kiermen cu P., si e wordo haya culpabel, lo no wordo castiga. Si P. wordo haya culpabel, e lo mester sinta su castigo di prizon. Con esaki lo bay bira ta dia di tratamento di e caso lo haya sa. □